

慧日佛學班第 8 期（《大智度論》）

## 《大智度論》卷 50

〈釋發趣品第二十之餘〉

（大正 25，416b2-419c12）

釋厚觀（2010.3.20）

【經】

（7）第七地：不應著二十法，應具足滿二十法

A、不應著二十法

「云何菩薩<sup>(1)</sup>不著我？」

「畢竟無我故。」

「云何菩薩<sup>(2)</sup>不著眾生、<sup>(3)</sup>不著壽命、<sup>(4)</sup>不著眾數，乃至知者、見者？」

「是諸法畢竟不可得故。」

「云何菩薩<sup>(5)</sup>不著斷見？」

「無有法斷，諸法畢竟不生故。」

「云何菩薩<sup>(6)</sup>不著常見？」

「若法不生，是不作常。」

「云何菩薩<sup>(7)</sup>不應取相？」

「無諸煩惱故。」<sup>1</sup>

「云何菩薩<sup>(8)</sup>不應作因見？」

「諸見不可得故。」<sup>2</sup>

「云何菩薩<sup>(9)</sup>不著名色？」

「名色處相無故。」

「云何菩薩<sup>(10)</sup>不著五眾、<sup>(11)</sup>不著十八界、<sup>(12)</sup>不著十二入<sup>3</sup>？」

「是諸法性無故。」

「云何菩薩<sup>(13)</sup>不著三界？」

「三界性無故。」

「云何菩薩<sup>(14)</sup>不應作著心？云何菩薩<sup>(15)</sup>不應作願？云何菩薩<sup>(16)</sup>不應作依止？」

「是諸法性無故。」

「云何菩薩<sup>(17)</sup>不著依佛見？」

「作依見，不見佛故。」<sup>4</sup>

<sup>1</sup> 參見《大般若波羅蜜多經》卷 416〈18 修治地品〉：「云何菩薩摩訶薩應遠離相想？善現！若菩薩摩訶薩觀貪等惑無所有故，是為菩薩摩訶薩應遠離相想。」（大正 7，86b14-17）

<sup>2</sup> 參見《大般若波羅蜜多經》卷 416〈18 修治地品〉：「云何菩薩摩訶薩應遠離見執？善現！若菩薩摩訶薩都不見有諸見性故，是為菩薩摩訶薩應遠離見執。」（大正 7，86b17-19）

<sup>3</sup> 「不著十八界」與「不著十二入」位置互換【石】。（大正 25，416d，n.10）

「云何菩薩<sup>(18)</sup>不著依法見？」  
「法不可見故。」  
「云何菩薩<sup>(19)</sup>不著依僧見？」  
「僧相無為不可依故。」  
「云何菩薩<sup>(20)</sup>不著依戒見？」  
「罪、無罪不著故。  
是為菩薩住七地中，二十法所不應著。」

#### **B、應具足滿二十法**

「云何菩薩應<sup>(1)</sup>具足空？」  
「具足諸法自相空故。」  
「云何菩薩<sup>(2)</sup>無相證？」  
「不念諸相故。」  
「云何菩薩<sup>(3)</sup>知無作？」  
「於三界中不作故。」<sup>5</sup>  
「云何菩薩<sup>(4)</sup>三分清淨？」  
「十善道具足故。」  
「云何菩薩<sup>(5)</sup>一切眾生中慈悲智具足？」  
「得大悲故。」  
「云何菩薩<sup>(6)</sup>不念一切眾生？」  
「淨佛<sup>6</sup>世界具足故。」<sup>7</sup>  
「云何菩薩<sup>(7)</sup>一切法等觀？」  
「於諸法不損益故。」  
「云何菩薩<sup>(8)</sup>知諸法實相？」  
「諸法實相無知故。」<sup>8</sup>  
「云何菩薩<sup>(9)</sup>無生忍？」  
「為諸法(416c)不生不滅、不作故<sup>9</sup>。」

<sup>4</sup> 參見《大般若波羅蜜多經》卷 416〈18 修治地品〉：「云何菩薩摩訶薩應遠離依佛見執？善現！若菩薩摩訶薩知依佛見執不得見佛故，是為菩薩摩訶薩應遠離依佛見執。」(大正 7, 86c15-18)

<sup>5</sup> 三三昧：自相空，不念諸相，三界中不作。(導師《大智度論筆記》[E003] p.289)

<sup>6</sup> [佛]—【宋】【元】【明】【宮】【聖】。(大正 25, 416d, n.11)

<sup>7</sup> 參見《大般若波羅蜜多經》卷 416〈18 修治地品〉：「云何菩薩摩訶薩應圓滿悲愍有情，及於有情無所執著？善現！若菩薩摩訶薩已得大悲及嚴淨土都無所執，是為菩薩摩訶薩應圓滿悲愍有情，及於有情無所執著。」(大正 7, 87a14-17)

<sup>8</sup> 參見《大般若波羅蜜多經》卷 416〈18 修治地品〉：「云何菩薩摩訶薩應圓滿通達真實理趣，及於此中無所執著？善現！若菩薩摩訶薩於一切法真實理趣，雖如實通達而無所通達都無所執，是為菩薩摩訶薩應圓滿通達真實理趣，及於此中無所執著。」(大正 7, 87a25-b1)

「云何菩薩<sup>(10)</sup>無生智？」

「知名色不生故。」<sup>10</sup>

「云何菩薩<sup>(11)</sup>說諸法一相？」

「心<sup>11</sup>不行<sup>12</sup>二相故。」<sup>13</sup>

「云何菩薩<sup>(12)</sup>破分別相？」

「一切法不分別故。」<sup>14</sup>

「云何菩薩<sup>(13)</sup>轉憶想<sup>15</sup>？」

「小、大、無量想<sup>16</sup>轉故。」<sup>17</sup>

「云何菩薩<sup>(14)</sup>轉見？」

「於聲聞、辟支佛地見轉故。」<sup>18</sup>

「云何菩薩<sup>(15)</sup>轉煩惱？」

「斷諸煩惱故。」<sup>19</sup>

「云何菩薩<sup>(16)</sup>等定慧地？」

「所謂得一切種智故<sup>20</sup>。」<sup>21</sup>

「云何菩薩<sup>(17)</sup>調意<sup>22</sup>？」

「於三界不動故。」<sup>23</sup>

<sup>9</sup> 作故＝作故忍【宋】【宮】【聖】【石】，＝作忍故【元】【明】。(大正 25，416d，n.13)

<sup>10</sup> 參見《大般若波羅蜜多經》卷 416〈18 修治地品〉：「云何菩薩摩訶薩應圓滿無生忍智？善現！若菩薩摩訶薩忍一切法無生、無滅、無所造作，及知名色畢竟不生，是為菩薩摩訶薩應圓滿無生忍智。」(大正 7，87b1-4)

<sup>11</sup> (一)＋心【元】【明】【石】。(大正 25，416d，n.14)

<sup>12</sup> 行＝作【石】。(大正 25，416d，n.15)

<sup>13</sup> 參見《大般若波羅蜜多經》卷 416〈18 修治地品〉：「云何菩薩摩訶薩應圓滿說一切法一相理趣？善現！若菩薩摩訶薩於一切法行不二相，是為菩薩摩訶薩應圓滿說一切法一相理趣。」(大正 7，87b4-7)

<sup>14</sup> 參見《大般若波羅蜜多經》卷 416〈18 修治地品〉：「云何菩薩摩訶薩應圓滿滅除分別？善現！若菩薩摩訶薩於一切法不起分別，是為菩薩摩訶薩應圓滿滅除分別。」(大正 7，87b7-10)

<sup>15</sup> 想＝相【石】。(大正 25，416d，n.16)

<sup>16</sup> 想＝相【聖】。(大正 25，416d，n.17)

<sup>17</sup> 參見《大般若波羅蜜多經》卷 416〈18 修治地品〉：「云何菩薩摩訶薩應圓滿遠離諸想？善現！若菩薩摩訶薩遠離小、大及無量想，是為菩薩摩訶薩應圓滿遠離諸想。」(大正 7，87b10-13)

<sup>18</sup> 參見《大般若波羅蜜多經》卷 416〈18 修治地品〉：「云何菩薩摩訶薩應圓滿遠離諸見？善現！若菩薩摩訶薩遠離聲聞、獨覺地見，是為菩薩摩訶薩應圓滿遠離諸見。」(大正 7，87b13-15)

<sup>19</sup> 參見《大般若波羅蜜多經》卷 416〈18 修治地品〉：「云何菩薩摩訶薩應圓滿遠離煩惱？善現！若菩薩摩訶薩棄捨一切有漏煩惱習氣相續，是為菩薩摩訶薩應圓滿遠離煩惱。」(大正 7，87b15-18)

<sup>20</sup> [故]－【宋】【宮】【聖】。(大正 25，416d，n.18)

<sup>21</sup> 參見《大般若波羅蜜多經》卷 416〈18 修治地品〉：「云何菩薩摩訶薩應圓滿止觀地？善現！若菩薩摩訶薩修一切智、一切相智，是為菩薩摩訶薩應圓滿止觀地。」(大正 7，87b18-20)

<sup>22</sup> (慧地)＋調意【元】【明】。(大正 25，416d，n.19)

<sup>23</sup> 參見《大般若波羅蜜多經》卷 416〈18 修治地品〉：「云何菩薩摩訶薩應圓滿調伏心性？善現！

「云何菩薩<sup>(18)</sup>心寂滅？」

「制六根故。」

「云何菩薩<sup>(19)</sup>無礙智？」

「得佛眼故。」

「云何菩薩<sup>(20)</sup>不染愛？」

「捨六塵故。」

是為菩薩住七地中，具足二十法。」

#### (8) 第八地：應具足二類五法

##### A、初五法應具足

「云何菩薩<sup>(1)</sup>順入眾生心？」

「菩薩以一<sup>24</sup>心知一切眾生心及心數法。」

「云何菩薩<sup>(2)</sup>遊戲諸神通？」

「以是神通從一佛國<sup>25</sup>至一佛國，亦不作佛國想。」

「云何菩薩<sup>26(3)</sup>觀諸佛國？」

「自住其國，見無量諸佛國，亦無佛國想。」

「云何菩薩<sup>(4)</sup>如所見佛國，自莊嚴其國？」

「住轉輪聖王地，遍至三千大千世界以自莊嚴。」<sup>27</sup>

「云何菩薩<sup>(5)</sup>如實觀佛身？」

「如實觀法身故。」

是為菩薩住八地中具足五<sup>28</sup>法。」

##### B、次五法應具足

「云何菩薩<sup>(1)</sup>知上下諸根？」

「菩薩住佛十力，知一切眾生上下諸根。」

「云何菩薩<sup>(2)</sup>淨佛世界？」

「淨眾生故。」

「云何菩薩<sup>(3)</sup>如幻三昧？」

---

若菩薩摩訶薩不著三界，是為菩薩摩訶薩應圓滿調伏心性。」(大正 7，87b20-23)

<sup>24</sup> [一] — 【宮】。(大正 25，416d，n.20)

<sup>25</sup> 國=界【宋】【元】【明】【宮】【聖】下同(大正 25，416d，n.21)

<sup>26</sup> [云何菩薩] — 【聖】。(大正 25，416d，n.22)

<sup>27</sup> 參見《大般若波羅蜜多經》卷 416〈18 修治地品〉：「云何菩薩摩訶薩應圓滿見諸佛土，如其所見而自嚴淨種種佛土？善現！若菩薩摩訶薩住一佛土，能見十方無邊佛國，亦能示現，而曾不生佛國土想。又為成熟諸有情故，現處三千大千世界轉輪王位而自莊嚴，亦能棄捨而無所執，是為菩薩摩訶薩應圓滿見諸佛土，如其所見而自嚴淨種種佛土。」(大正 7，87c15-22)

<sup>28</sup> (1) 四=五【元】【明】【聖】【石】。(大正 25，416d，n.23)

(2) 《大正藏》原作「四」，今依「元」本等作「五」。

「住是三昧，能成辦一切事，亦不生心相。」

「云何菩薩<sup>(4)</sup>常入三昧？」

「菩薩得報生三昧故。」

「云何菩薩<sup>(5)</sup>隨眾生所應善根受身？」

「菩薩知眾生所應生善根而<sup>29</sup>為受身，成就眾生故。

是為菩薩住八地中，具足五法。」

**(9) 第九地：應具足十二法**

「云何菩薩<sup>(1)</sup>受無邊<sup>30</sup>世界所度之分？」

「十方無量世界<sup>31</sup>中眾生，如諸佛法所應度者而度脫之。」

「云何菩薩<sup>(2)</sup>得如所願？」

「六波羅蜜具足故。」

「云何菩薩(417a)<sup>(3)</sup>知諸天、龍、夜叉、捷闍婆<sup>32</sup>語<sup>33</sup>？」

「辭辯<sup>34</sup>力故。」

「云何菩薩<sup>(4)</sup>胎生成就？」

「菩薩世世常化生故。」<sup>35</sup>

「云何菩薩<sup>(5)</sup>家成就？」

「常在大家生故。」

「云何菩薩<sup>(6)</sup>所生成就？」

「若剎利家生，若婆羅門家生故。」

<sup>29</sup> 而=所【宋】【元】【明】【宮】。(大正 25, 416d, n.24)

<sup>30</sup> 無邊+ (身)【宋】【宮】。(大正 25, 416d, n.25)

<sup>31</sup> 《大正藏》原作「世界量」，今依《高麗藏》作「量世界」(第 14 冊, 880a18)。

<sup>32</sup> 捷闍婆=捷闍婆【宋】【元】【明】【宮】，=捷闍波【聖】下同。(大正 25, 417d, n.1)

<sup>33</sup> (1) 諸=語【宋】【元】【明】【宮】【聖】【石】。(大正 25, 417d, n.2)

(2) 《大正藏》原作「諸」，《高麗藏》亦作「諸」(第 14 冊, 880a22)，今依【宋】本等作「語」。

<sup>34</sup> (1) 辭辯：四無礙辯(義無礙辯、法無礙辯、辭無礙辯、樂說無礙智)中之「辭無礙辯」。

(2) 四無礙辯又稱四無礙智，參見《大智度論》卷 25 (大正 25, 246a22-247b2)。

(3) 《大智度論》卷 25：「是名字及義，云何令眾生得解？當以言辭分別莊嚴，能令人解，通達無滯，是名辭無礙智。」(大正 25, 246b9-11)

(4) 《大智度論》卷 25：「辭無礙智者，以語言說名字義，種種莊嚴語言，隨其所應，能令得解。所謂天語，龍、夜叉、捷闍婆、阿脩羅、迦樓羅、摩睺羅伽等非人語；釋、梵、四天王等世主語；人語；一語、二語、多語；略語、廣語；女語、男語；過去、未來、現在語——如是等語言，能令各各得解。自語、他語，無所毀譽。所以者何？是一切法不在語中，語是非實義；若語是實義，不可以善語說不善。但為入涅槃故說令解，莫著語言！復次，用是語言，能令眾生隨法義行。所以者何？言語皆入諸法實相中。是名辭無礙智。」(大正 25, 246c10-21)

<sup>35</sup> 參見《大般若波羅蜜多經》卷 416 (18 修治地品)：「云何菩薩摩訶薩應圓滿入胎具足？善現！若菩薩摩訶薩雖一切生處實恒化生，而為益有情現入胎藏，於中具足無邊勝事，是為菩薩摩訶薩應圓滿入胎具足。」(大正 7, 88b3-6)

「云何菩薩<sup>(7)</sup>性<sup>36</sup>成就？」

「如過去菩薩所生姓，從此中生故。」<sup>37</sup>

「云何菩薩<sup>(8)</sup>眷屬成就？」

「純諸菩薩摩訶薩為眷屬故。」

「云何菩薩<sup>(9)</sup>出生成就？」

「生時光明遍照無量無邊世界，亦不取相故。」<sup>38</sup>

「云何菩薩<sup>(10)</sup>出家成就？」

「出家時，無量百千億諸天侍從出家，是一切眾生必<sup>39</sup>至三乘。」

「云何菩薩<sup>(11)</sup>莊嚴佛樹成就？」

「是菩提樹以黃金為根，七寶為莖、節、枝、葉，莖、節、枝、葉光明，遍照十方阿僧祇三千大千世界。」

「云何菩薩<sup>(12)</sup>一切諸善<sup>40</sup>功德成滿具足？」

「菩薩得眾生清淨，佛國亦淨<sup>41</sup>。<sup>42</sup>

是為菩薩住九地中具足十二法。」

#### (10) 第十地<sup>43</sup>

「云何菩薩住十地中當知如佛？」

#### A、約菩薩十地，當知如佛

「若菩薩摩訶薩具足六波羅蜜、四念處乃至十八不共法，一切種智具足滿<sup>44</sup>，斷一切煩惱及習；是為<sup>45</sup>菩薩摩訶薩住十地中當知如佛。<sup>46</sup>

<sup>36</sup> 性=姓【宋】【元】【明】【宮】【石】。(大正 25, 417d, n.4)

《高麗藏》亦作「性」(第 14 冊, 880b3)。

<sup>37</sup> 參見《大般若波羅蜜多經》卷 416〈18 修治地品〉:「云何菩薩摩訶薩應圓滿種姓具足?善現!若菩薩摩訶薩常在過去諸菩薩摩訶薩種姓中生,是為菩薩摩訶薩應圓滿種姓具足。」(大正 7, 88b13-16)

<sup>38</sup> 參見《大般若波羅蜜多經》卷 416〈18 修治地品〉:「云何菩薩摩訶薩應圓滿生身具足?善現!若菩薩摩訶薩於初生時,其身具足一切相好,放大光明遍照無邊諸佛世界,亦令彼界六種變動,有情遇者無不蒙益,是為菩薩摩訶薩應圓滿生身具足。」(大正 7, 88b19-24)

<sup>39</sup> 必=畢【石】。(大正 25, 417d, n.5)

<sup>40</sup> 善+(根)【宋】【元】【明】【宮】。(大正 25, 417d, n.6)

<sup>41</sup> (清)+淨【石】。(大正 25, 417d, n.7)

<sup>42</sup> 參見《大般若波羅蜜多經》卷 416〈18 修治地品〉:「云何菩薩摩訶薩應圓滿一切功德成辦具足?善現!若菩薩摩訶薩滿足殊勝福慧資糧,成就有情、嚴淨佛土,是為菩薩摩訶薩應圓滿一切功德成辦具足。」(大正 7, 88c7-10)

<sup>43</sup> 參見印順法師著《初期大乘佛教之起源與開展》p.707, p.710- p.711。

<sup>44</sup> (圓)+滿【元】【明】。(大正 25, 417d, n.8)

<sup>45</sup> 爲=名【石】。(大正 25, 417d, n.9)

<sup>46</sup> 參見《大般若波羅蜜多經》卷 416〈18 修治地品〉:「云何菩薩摩訶薩住第十地已,與諸如來應言無別?善現!是菩薩摩訶薩已圓滿六波羅蜜多,乃至已圓滿十八不共法,具一切智、一切相智,若復永斷一切煩惱習氣相續便住佛地。由此故說:若菩薩摩訶薩住第十地已,與諸如來應言無別。」(大正 7, 88c11-17)

**B、約三乘共地，第十地即是佛地**

須菩提！菩薩摩訶薩住是十地中，以方便力故，行六波羅蜜，行四念處乃至十八不共法，過乾慧地、性地、八忍<sup>47</sup>地、見地、薄地、離欲地、已作地、辟支佛地、菩薩地，過是九地，住於佛地。是為菩薩十地。<sup>48</sup>

**(三) 總結**

如是，須菩提！是名<sup>49</sup>菩薩摩訶薩大乘發趣。」

【論】者<sup>50</sup>言：

**(7) 第七地：不應著二十法，應具足滿二十法**

**A、總說不應著二十法**

我等二十法<sup>51</sup>不可得<sup>52</sup>故不著。

不可得因緣，如先種種說。

(1-4) 我見乃至知者、見者，<sup>(17)</sup> 佛見、<sup>(19)</sup> 僧見，是入眾生空故，是見不應著。

(5-16,18,20) 餘斷、常乃至戒見，是法空故，不應著。

**※ 別明「因見」**

問曰：餘者可知，<sup>(8)</sup> 因見云何？

答曰：一切有為法展轉為(417b)因果；是法中著心取相生見，是名「因見」——所謂非因說因，或因果一<sup>53</sup>異等。

**B、應具足滿二十法**

**(A) 釋第一法：具足空**

「具足空」<sup>54</sup>者，

**a、十八空**

若菩薩能盡行十八空，是名「具足空」。

**b、眾生空、法空**

<sup>47</sup> 忍=人【聖】【石】。(大正 25, 417d, n.10)

<sup>48</sup> 參見《大般若波羅蜜多經》卷 416〈18 修治地品〉：「善現！云何菩薩摩訶薩住第十地趣如來地？善現！是菩薩摩訶薩方便善巧，行六波羅蜜多、四念住乃至十八不共法，超淨觀地、種姓地、第八地、具見地、薄地、離欲地、已辦地、獨覺地及菩薩地，又能永斷一切煩惱習氣相續，便成如來、應、正等覺住如來地。善現！如是菩薩摩訶薩住第十地趣如來地。」(大正 7, 88c17-24)

<sup>49</sup> [是名]—【宋】【元】【明】【宮】。(大正 25, 417d, n.11)

<sup>50</sup> (論)+者【明】，者=釋【石】。(大正 25, 417d, n.12)

<sup>51</sup> 我等二十法，即第七地菩薩不著我、不著眾生乃至不著依戒見等二十法，參見《摩訶般若波羅蜜經》卷 6〈20 發趣品〉(大正 8, 257a27-b9)，《大智度論》卷 50 (大正 25, 416b7-22)。

<sup>52</sup> 《正觀》第 6 期，p.137：我不可得，參見《大智度論》卷 12 (大正 25, 148b3-150a17)，卷 31 (295c-296a)，卷 42 (364c21-365a15, 368c28-369a24)。

<sup>53</sup> 一=必【宋】【宮】【聖】。(大正 25, 417d, n.13)

<sup>54</sup> 「一、能行十八空……………」

具足空┆ 二、能行我法二空 ┆ 皆自相空 (導師《大智度論筆記》[ B014 ] p.135)

┆ 三、能行畢竟空……………」

復次，能行二種空——眾生空、法空，是名「具足空」。

**c、畢竟空**

復次，若菩薩能行畢竟空，於中不著，是名「具足空」。

**d、自相空**

問曰：若爾者，佛此中何以但說「自相空」？

答曰：此三種空皆是自相空。以住六地菩薩福德故利根，利根<sup>55</sup>故分別諸法取相；以是故，七地中以相<sup>56</sup>空為具足空。

**e、有為空、無為空、不可得空**

佛或時說有為空、無為空名「具足空」，或時說不可得空名「具足空」。

**(B) 釋第二法：無相證**

「無相證」者，「無相」即是涅槃，可證，不可修。不可修故，不得言「知」；無量無邊不可分別故，不得言「具足」。

**(C) 釋第三法：知無作**

「知無作」者，三事<sup>57</sup>雖通是「知」，二事更義立其名，無作但有「知」名。

**(D) 釋第四法：三分清淨**

「三分清淨」者，所謂十善道——身三、口四、意三，是名「三分」。上以說三<sup>58</sup>解脫門故，此中不復說<sup>59</sup>。

「三分清淨」者，或有人身業清淨，口業不清淨；口業清淨，身業不清淨；或身口業清淨，意業不清淨；或有世間三業清淨，而未能離著；是菩薩三業清淨及離著故，是名「三分清淨」。

**(E) 釋第五法：一切眾生中慈悲智具足**

「一切眾生中具足慈悲智」者，悲有三種：眾<sup>60</sup>生緣、法緣、無緣。<sup>61</sup>此中說「無緣大悲」名「具足」。所謂法性<sup>62</sup>空，乃至實相亦空，是名「無緣大悲」。菩薩深入實相，然後悲念眾生；<sup>63</sup>譬如人有一子，得好寶物，則<sup>64</sup>深心愛念欲以與之。

<sup>55</sup> [利根] — 【石】。(大正 25, 417d, n.14)

<sup>56</sup> (自) + 相【元】【明】。(大正 25, 417d, n.15)

<sup>57</sup> 三事：空、無相、無作。

<sup>58</sup> 上以說三 = 已上說【宋】【元】【明】， = 以上說【宮】【聖】。(大正 25, 417d, n.16)

<sup>59</sup> 《正觀》第 6 期，p.137：就「具足空」解說，參見《大智度論》卷 50 (大正 25, 417b2-15)。

<sup>60</sup> [眾] — 【宋】【元】【明】【宮】【聖】【石】。(大正 25, 417d, n.17)

<sup>61</sup> 參見《大智度論》卷 20 (大正 25, 208c-209a)，卷 40 (350b25-29)。

<sup>62</sup> [性] — 【宋】【元】【明】【宮】【聖】。(大正 25, 417d, n.18)

<sup>63</sup> 三悲┌ 生緣

└ 法緣

└ 無緣 —— 深入實相悲念眾生 (導師《大智度論筆記》[ B014 ] p.135)

<sup>64</sup> [則] — 【宋】【元】【明】【宮】。(大正 25, 417d, n.19)

**(F) 釋第六法：不念一切眾生**

「不念一切眾生」者，所謂淨世界具足故。

**※ 釋疑：若不念眾生，云何能淨佛世界**

問曰：若不念眾生者，云何能淨佛世界？

答曰：菩薩令眾生住十善道，為莊嚴佛國<sup>65</sup>；雖莊嚴，未得無礙莊嚴。

今<sup>66</sup>菩薩教化（417c）眾生，不取眾生相，諸善根福德清淨；諸善根福德清淨故，是無礙莊嚴。

**(G) 釋第七法：一切法等觀**

「一切法等觀」者，如法等忍中說。<sup>67</sup>

此中佛自說：「於諸法不增損。」

**(H) 釋第八法：知諸法實相**

「知諸法實相」者，如先種種因緣廣說。<sup>68</sup>

**(I) 釋第九法：無生忍**

「無生法忍<sup>69</sup>」者，於無生滅諸法實相中，信受、通達、無礙、不退，是名「無生忍」。

**(J) 釋第十法：無生智**

「無生智」者，初名<sup>70</sup>「忍」，後名「智」；麤者「忍」，細者「智」。

佛自說：「知名色不生故。」

**(K) 釋第十一法：說諸法一相**

「說諸<sup>71</sup>法一相」者，菩薩知內外十二入皆是魔網、虛誑不實，於此中生六種識亦是魔網虛誑。何者是實？唯不二法——無眼、無色，乃至無意、無法等，是名實。<sup>72</sup>令眾生離十二入故，常以種種因緣說是不二法。

**(L) 釋第十二法：破分別相**

「破分別相」者，菩薩住是不二法中，破所緣男女、長短、大小等分別諸法。

**(M) 釋第十三法：轉憶想**

「轉憶想」者，破內心憶想分別諸法等。

<sup>65</sup> 國+（土）【石】。（大正 25，417d，n.20）

<sup>66</sup> 今=令【宋】【元】【明】【宮】。（大正 25，417d，n.21）

<sup>67</sup> 《正觀》第 6 期，p.137：參見《大智度論》卷 5：「善法、不善法、有漏、無漏、有為、無為等法——如是諸法入不二入法門，入實法相門。如是入竟，是中深入諸法實相時，心忍直入、無諍無礙，是名**法等忍**。」（大正 25，97b22-29）

<sup>68</sup> 《正觀》第 6 期，p.137：參見《大智度論》卷 15（大正 25，170b16-172a4），《大智度論》卷 18（大正 25，190b10-191a1），《大智度論》卷 43 大正 25，370a21-c23）。

<sup>69</sup> 法忍=忍法【宋】【元】【明】【宮】【聖】。（大正 25，417d，n.23）

<sup>70</sup> [名]—【宋】【元】【明】【宮】。（大正 25，417d，n.24）

<sup>71</sup> 說諸=諸說【宋】【宮】。（大正 25，417d，n.25）

<sup>72</sup> 不二法：根塵不生識。（導師《大智度論筆記》〔E007〕p.299）

**(N) 釋第十四法：轉見**

「轉見」者，是菩薩先轉我見、邊見等邪見，然後入道；今轉法見<sup>73</sup>、涅槃見，以諸法無定相。

「轉涅槃」者，轉聲聞、辟支佛見，直趣佛道。

**(O) 釋第十五法：轉煩惱**

「轉煩惱」<sup>74</sup>者，

**a、離細煩惱**

菩薩以福德持戒力故，折伏麤煩惱，安隱行道，唯有愛、見、慢等微細者在，今亦離細煩惱。<sup>75</sup>

**b、觀煩惱即實相**

復次，菩薩用實智慧，觀是<sup>76</sup>煩惱即<sup>77</sup>是實相；<sup>78</sup>譬如神通人，能轉不淨為淨。

**(P) 釋第十六法：等定慧地**

「等定慧地」者，菩薩於初三地慧多定少，未能攝心故；後三地定多慧少——以是故，不得入菩薩位。今眾生空、法空，定慧等故，能安隱行菩薩道；從阿鞞跋致地，漸漸得一切種智慧地。<sup>79</sup>

**(Q) 釋第十七法：調意**

「調意」者，是菩薩先憶念老、病、死、三惡道，慈愍眾生故，調伏心意；今<sup>80</sup>知諸法實相故，不著三界，不著三界故調伏。

**(R) 釋第十八法：心寂滅**

<sup>73</sup> 七住菩薩：轉法見。(導師《大智度論筆記》〔E006〕p.297)

<sup>74</sup> 「一、七地前折伏粗煩惱——愛見慢等細者七地離轉煩惱」二、觀煩惱即實相(導師《大智度論筆記》〔B014〕p.135)

<sup>75</sup> 參見(Lamotte, p.2428, n.1)：參見《智度論》卷 39：「小乘人畏三惡道故，以十不善業為罪。大乘人以一切能生著心取相法，與三解脫門相違者名為罪。以是事異故，名為大乘。若見有是三業雖不起惡，亦不名牢固；不見是身口意是三業根本，是為牢固。是菩薩法空故，不見是三事——用是三事起慳貪相、犯戒相、瞋恚相、懈怠相、散亂相、愚癡相。因無故果亦無；如無樹則無蔭，若能如是觀者，則能除身口意麤業。問曰：先說罪業今何以故言麤業？答曰：麤業、罪業無異，罪即是麤，不名為細。復次，聲聞人以身口不善業名為麤，意不善業名為細；瞋恚、邪見等諸結使名為麤罪，愛慢等結使名為細罪；三惡覺——所謂欲覺、瞋覺、惱覺名為麤；親里覺、國土覺、不死覺名為細，但善覺名為微細。於摩訶衍中盡皆為麤。以是故，此說麤罪。」(大正 25, 345c19-346a5)

<sup>76</sup> 是=者【宋】【宮】。(大正 25, 417d, n.26)

<sup>77</sup> 即=則【宋】【宮】。(大正 25, 417d, n.27)

<sup>78</sup> 煩惱即實相。(導師《大智度論筆記》〔E007〕p.299)

<sup>79</sup> 「初三地——慧多定少.....」  
|  
| ..... | 不得入菩薩位

七地 | 後三地——定多慧少.....  
|  
| 七地——我法二空定慧等 .....行菩薩道，從不退地，漸得一切種智  
(導師《大智度論筆記》〔B014〕p.135)

<sup>80</sup> 今=令【宋】【元】【明】【宮】\*。(大正 25, 417d, n.21)

「心寂滅」者，菩薩為涅槃故，先於<sup>81</sup>五（418a）欲中折伏五情，意情難折伏<sup>82</sup>故；今住七地，意情寂滅。<sup>83</sup>

**(S) 釋第十九法：無礙智**

「無礙智」者，菩薩得般若波羅蜜，於一切實、不實法中無礙；得是道慧，將一切眾生令入實法，得無礙解脫、得佛眼，於一切法中無礙。

**※釋疑：七地中何以說「得佛眼」**

問曰：是七地中，何以說「得佛眼」？

答曰：是中應學佛眼；於諸法無礙，似如佛眼。

**(T) 釋第二十法：不染愛**

「不染愛」者，是菩薩雖於七地得智慧力，猶有先世因緣，有此肉身，入禪定不著，出禪定時有著氣——隨此肉眼所見，見好人親愛，或愛是七地智慧實法。<sup>84</sup>是故佛說：「於六塵中行捨心，不取好惡相。」（七地竟）

**(8) 第八地：應具足二類五法**

**A、初五法應具足**

**(A) 釋第一法：順入眾生心**

「順入眾生心」者，菩薩住是八地中，順觀一切眾生心之所趣，動發思惟，深念順觀，以<sup>85</sup>智慧分別知<sup>86</sup>：是眾生永無得度因緣；是眾生過無量阿僧祇劫然後可度，是眾生或一劫、二劫乃至<sup>87</sup>十劫可度，是眾生或一世、二世乃至今世可度，是眾生或即時可度者，是熟、是未熟；是人可以聲聞乘度，是人可以辟支佛乘度。譬如良醫診病，知差<sup>88</sup>久近、可治不可治者。

**(B) 釋第二法：遊戲諸神通**

「遊戲諸神通」者，先得諸神通；今得自在遊戲，能至無量無邊世界。菩薩住七地中時，欲取涅槃；爾時，有種種因緣及十方諸佛擁護，還<sup>89</sup>生心欲度眾生。<sup>90</sup>好莊嚴神通，隨意自在，乃至無量無邊世界中無所罣礙，見諸佛國，亦不取佛國相。

**(C) 釋第三法：觀諸佛國**

「觀諸佛國」者，

<sup>81</sup> 先於=於先【宋】【元】【明】【宮】。(大正 25, 417d, n.29)

<sup>82</sup> [伏]—【宋】【元】【明】【宮】【聖】。(大正 25, 418d, n.1)

<sup>83</sup> 六地折伏五情

七地<sup>上</sup>七地折伏意情（導師《大智度論筆記》[B014] p.136）

<sup>84</sup> 七住菩薩：肉身。入定不著習氣，出定有習氣。（導師《大智度論筆記》[E006] p.297）

<sup>85</sup> 以=已【宋】【宮】。(大正 25, 418d, n.2)

<sup>86</sup> 知=如【宋】【元】【明】【宮】。(大正 25, 418d, n.3)

<sup>87</sup> [二劫乃至]—【宋】【宮】【聖】。(大正 25, 418d, n.4)

<sup>88</sup> 差=瘥【宋】【元】【明】【宮】。(大正 25, 418d, n.5)

<sup>89</sup> 還=眾【宋】【宮】。(大正 25, 418d, n.6)

<sup>90</sup> 七住菩薩：欲自滅心，十方佛勸。（導師《大智度論筆記》[E006] p.297）

**a、自以神通力飛往十方佛國取淨佛國相**

有菩薩以神通力飛到十方，觀諸清淨世界，取相欲自莊嚴其國。

**b、佛帶往十方佛國取淨佛國相**

有菩薩佛將至十方，示清淨世界，取淨國相，自作願行；如世自在王佛將法積比丘至十方，示清（418b）淨世界。<sup>91</sup>

**c、自住本國以天眼見十方佛國清淨相**

或有菩薩自住本國，用天眼見十方清淨世界，初取淨相，後得不著心故還捨。

**(D) 釋第四法：如所見佛國，自莊嚴其國**

「如所見佛國，自莊嚴其國」者，如先說。<sup>92</sup>

是八地名轉輪地。如轉輪王<sup>93</sup>寶輪至處，無礙無障，無諸怨敵；菩薩住是地中，能雨法寶，滿眾生願，無能障礙，亦能取所見淨國相而自莊嚴其國。

**(E) 釋第五法：如實觀佛身**

「如實觀佛身」者，觀諸佛身如幻如化，非五眾、十二入、十八界所攝，若長若短，若干種色，隨眾生先世業因緣所見。

此中佛自說：「見法身者，是為見佛。」<sup>94</sup>

「法身」者，不可得法<sup>95</sup>空；<sup>96</sup>不可得法空者，諸因緣邊生法，無有自性。<sup>97</sup>

**B、次五法應具足**

**(A) 釋第一法：知上下諸根**

「知上下諸根」者，如十力中說。<sup>98</sup>菩薩先知一切眾生心所行，誰鈍、誰利，誰布施多，誰智慧多；因其多者而度脫之。

**(B) 釋第二法：淨佛世界**

「淨佛世界」者，有二種淨：一者、菩薩自淨其身；二者、淨眾生心，令行清淨道。<sup>99</sup>以彼<sup>100</sup>我因緣清淨故，隨所願得清淨世界。<sup>101</sup>

<sup>91</sup> (1) 參見《佛說無量壽經》卷上（大正 12，267b19-c13）。

(2) 《大智度論》卷 10：「問曰：更有十方諸清淨世界，如阿彌陀佛安樂世界等，何以故但以普華世界為喻？答曰：阿彌陀佛世界不如華積世界。何以故？法積比丘，佛雖將至十方觀清淨世界，功德力薄，不能得見上妙清淨世界。以是故，世界不如。」（大正 25，134b4-10）

<sup>92</sup> 《正觀》第 6 期，p.137：參見《大智度論》卷 10（大正 25，134b），卷 38（342c28-343a4），卷 39（344b1-16）。

<sup>93</sup> （聖）+王【宋】【元】【明】【宮】。（大正 25，418d，n.7）

<sup>94</sup> (1) 參見《摩訶般若波羅蜜經》卷 6〈20 發趣品〉：「云何菩薩如實觀佛身？如實觀法身故。」（大正 8，259b8）

(2) 另參見《佛說大乘稻芊經》：「今日世尊觀見稻芊，告諸比丘，作如是說：『諸比丘！若見因緣，彼即見法；若見於法，即能見佛。』」（大正 16，823b27-29）

<sup>95</sup> 法=出【聖】。（大正 25，418d，n.9）

<sup>96</sup> 法身：法空不可得。（導師《大智度論筆記》〔E007〕p.299）

<sup>97</sup> 法空：緣生無性。（導師《大智度論筆記》〔E007〕p.299）

<sup>98</sup> 《正觀》第 6 期，p.138：參見《大智度論》卷 24（大正 25，238c27-239a26）。

<sup>99</sup> 菩薩自淨其身

八地淨佛世界—淨眾生心令行道（導師《大智度論筆記》〔B014〕p.136）

**(C) 釋第三法：入如幻三昧**

「入如幻三昧」者，如幻人一處住，所作<sup>102</sup>幻事，遍滿世界——所謂四種兵<sup>103</sup>眾，宮殿城郭，飲食歌舞，殺活<sup>104</sup>憂苦等；菩薩亦如是，住是三昧中，能於十方世界變化，遍滿其中——先行布施等充滿眾生；次說法教化，破壞三惡道；然後安立眾生於三乘——一切所可利益之事，無不成就。是菩薩心不動，亦不取心相。

**(D) 釋第四法：常入三昧**

「常入三昧」者，菩薩得如幻等三昧，所役心能有所作；今<sup>105</sup>轉身得報生三昧，<sup>106</sup>如人見色，不用心力。住是三昧中，度眾生安隱，勝於如幻三昧，自然成事，無所役用<sup>107</sup>；如人求財，有役力<sup>108</sup>得者，有自然得者。

**(E) 釋第五法：隨眾生所應善根受身**

「隨眾生所應善根受身」者，菩薩（418c）得二種三昧，二種神通——行得、報得；知以何身、以何語、以何因緣、以何事、以何道、以何方便而為受身，乃至受畜生身而化度之。（八地竟）

**(9) 第九地：應具足十二法<sup>109</sup>**

**A、釋第一法：受無邊世界所度之分**

「受無邊世界所度之分」者，無量阿僧祇十方世界六道中眾生，是菩薩教化所應<sup>110</sup>度者而度之。

是世界有三種：有淨、不淨、有雜。是三種世界中眾生所可應度有利益者，皆

<sup>100</sup>（此）+彼【石】。（大正 25，418d，n.10）

<sup>101</sup>「心淨眾生淨，心淨國土淨」，參見：

（1）《維摩詰所說經》〈佛國品〉（大正 14，538b26-c5）。

（2）印順法師著：《攝大乘論講記》p.170- p.171，《佛法概論》p.188- p.189，《淨土與禪》p.1-p.5，《學佛三要》p.17- p.18、p.60- p.61，《般若經講記》p.68- p.69，《我之宗教觀》p.56-p.57，《初期大乘佛教之起源與開展》，p.491。

（3）惠敏法師著〈「心淨則佛土淨」之考察〉，《中華佛學學報》第十期，p.25- p.44。

<sup>102</sup>作=住【聖】。（大正 25，418d，n.11）

<sup>103</sup>四種兵：象兵、馬兵、車兵、步兵。參見《雜阿含經》卷 40（1114 經）（大正 2，294a16），《長阿含經》卷 4《遊行經》（大正 1，29b16-18），《最勝問菩薩十住除垢斷結經》卷 8（大正 10，1030c5-6）等。

<sup>104</sup>殺活：1、謂死與生。2、指定人之死活。（《漢語大詞典（六）》，p.1487）

<sup>105</sup>今=念【宋】【元】【明】【宮】。（大正 25，418d，n.12）

<sup>106</sup>「如幻三昧

八地得二種三昧+報生三昧（導師《大智度論筆記》〔B014〕p.136）

<sup>107</sup>役用：役使；使用。（《漢語大詞典（三）》，p.926）

<sup>108</sup>役力：猶效力。晉陸雲《盛德頌》序：“臣命違千載之運，身生四百之外，恨不得役力聖明之鑒，寓目風塵之會。”（《漢語大詞典（三）》，p.925）

<sup>109</sup>本行：九地中攝。（導師《大智度論筆記》〔H014〕p.405）

案：此處「本行」指「處胎成就、家成就、所生成就、姓成就、眷屬成就、出生成就、出家成就」等事。

<sup>110</sup>所應=應所【宋】【宮】【聖】。（大正 25，418d，n.13）

攝取之。譬如然燈，為有目之人，不為盲者；菩薩亦如是，或先有因緣者，或<sup>111</sup>始作因緣者。

復次，三千大千世界名「一世界」，一時起、一時滅；如是等十方如恒河沙等世界，是「一佛世界」<sup>112</sup>；如是一佛世界數，如恒河沙等世界，是「一佛世界海」；如是佛世界海，數如十方恒河沙世界，是「佛世界種」。如是世界種，十方無量，是名「一佛世界」。於一切世界中取如是分，是名「一佛所度之分」。<sup>113</sup>

**B、釋第二法：得如所願**

「得如所願」者，是菩薩福德、智慧具足故，無願不得。聽者聞無量無邊世界所度之分，疑不可得；以是故，次說所願如意。此中佛自說「六波羅蜜具足」——五度，則福德具足；般若，則智慧具足。<sup>114</sup>

**C、釋第三法：知諸天、龍、夜叉、犍闍婆語而為說法**

「知諸天、龍、夜叉、犍闍婆語」者，

**(A) 福德、智慧具足故所願如意**

我上說福德、智慧具足，所願如意——知他人種種語，即是所願事。

**(B) 得宿命智清淨故**

復次，菩薩得宿命智<sup>115</sup>清淨故，知處處生一切語。

**(C) 願智故知立名者心**

復次，得願智故<sup>116</sup>，知立名者心，強作種種名字語言。

**(D) 得解眾生語言三昧故**

復次，菩薩得解眾生語言三昧故，通一切語無礙。

**(E) 自得四無礙智，又復學佛四無礙智故**

復次，自得四無礙智，又復學佛四無礙智；以是故，知眾生語言音聲。

**D、釋第四法：胎生成就<sup>117</sup>**

<sup>111</sup> 或=有【石】。(大正 25, 418d, n.14)

<sup>112</sup> (1) 華嚴經：一佛世界〔義似出此〕。(導師《大智度論筆記》〔H017〕p.409)

(2) 參見《大方廣佛華嚴經》卷 46：「於一念中，遍至東方一佛世界、百佛世界，千佛、百千佛、無量佛世界，乃至不可說不可說諸佛世界。閻浮提微塵等世界，乃至不可說不可說佛剎微塵等世界，悉得親見彼世界中一切諸佛及其眷屬。」(大正 9, 692b16-21)

(3) 另參見印順法師著《初期大乘佛教之起源與開展》，p.1026- p.1038。

<sup>113</sup>

┌	三千大千世界	—————	一世界
	十方如恒河沙等世界	—————	一佛世界……………一佛化此一分
世界└	十方如恒河沙等一佛世界	—————	一世界海
	十方如恒河沙等一佛世界海	—————	一佛世界種
└	十方無量世界種	—————	一切世界 (導師《大智度論筆記》〔B014〕p.137)

<sup>114</sup> 六度：前五——福；第六——慧。(導師《大智度論筆記》〔E007〕p.298)

<sup>115</sup> 智+ (慧)【石】。(大正 25, 418d, n.15)

<sup>116</sup> 故+ (願智故)【石】。(大正 25, 418d, n.16)

<sup>117</sup> 菩薩入胎：二說。(導師《大智度論筆記》〔E007〕p.299)

「處胎成就」者，

**(A) 乘白象入母胎**

有人言：菩薩乘白象，與無量兜率諸天圍遶、恭敬、供養、侍從，(419a) 入母胎。

**(B) 以三昧力入母胎**

有人言：菩薩母得如幻三昧力故，令腹廣大無量，一切三千大千世界菩薩及天龍鬼神皆得入出；胎中有宮殿、臺觀，先莊嚴床座，懸繪幡蓋，散花，燒香，皆是菩薩福德業因緣所感，然後菩薩來下處之。亦以三昧力故，下<sup>118</sup>入母胎，於兜率天上如故。

**E、釋第六法：所生成就<sup>119</sup>**

「生成就」者，

**(A) 從母右脇出，放大光明照無量世界**

菩薩欲生時，諸天龍鬼神莊嚴三千大千世界；是時，有七寶蓮花座，自然而有；從母胎中，有無量菩薩先出，坐蓮華上，叉手讚歎，俟<sup>120</sup>待<sup>121</sup>菩薩；及諸天龍、鬼神、仙聖、諸玉女等皆合手一心，欲見菩薩生。然後菩薩從母右脇出，如滿月從雲中出，放大光明，照無量世界。<sup>122</sup>是時，有大名聲，遍滿十方世界，唱言：「某<sup>123</sup>國菩薩末後身生。」

**(B) 或胎生或化生，生刹利、婆羅門二姓中**

或有菩薩化生蓮華。

於四生中，菩薩胎生<sup>124</sup>、化生。

於四種人中，菩薩生刹利、婆羅門二姓中——生此二種姓，人所貴故。

**F、釋第五法：家成就<sup>125</sup>**

「家成就」者，

**(A) 生婆羅門家、刹利家**

婆羅門家有智慧，刹利家有力勢；婆羅門利益後世，刹利利<sup>126</sup>益今世。是二種於世有益，是故菩薩在此中生。

**(B) 諸功德法家**

<sup>118</sup> 下+ (故)【聖】。(大正 25, 419d, n.1)

<sup>119</sup> 案：經中第五法是「家成就」，第六法是「所生成就」，論之次第與經所說相反。

<sup>120</sup> 俟(ム、)：等待。(《漢語大詞典(一)》，p.1433)

<sup>121</sup> 俟待=使待【聖】。(大正 25, 419d, n.2)

<sup>122</sup> 第六法「所生成就」，《摩訶般若波羅蜜經》僅提到「若刹利家生，若婆羅門家生故」(大正 25, 417a3-4)，而《大智度論》另提及「放大光明，照無量世界」，此似與第九法「云何菩薩出生成就？生時光明遍照無量無邊世界，亦不取相故」(大正 25, 417a7-8)有關。

<sup>123</sup> 某=其【聖】【石】。(大正 25, 419d, n.3)

<sup>124</sup> [生] - 【石】。(大正 25, 419d, n.4)

<sup>125</sup> 案：經中第五法是「家成就」，第六法是「所生成就」，論之次第與經所說相反。

<sup>126</sup> [利] - 【石】。(大正 25, 419d, n.5)

復次，諸功德法家，所謂不退轉生，是名「家生<sup>127</sup>」。

**G、釋第七法：姓成就**

「姓成就」者，

**(A) 觀世間何姓為貴、能攝眾生，即於是姓中生**

菩薩，兜率天上，觀世間何姓為貴、能攝眾生，即於是姓中生。如七佛中，初三佛，憍陳如姓中生；次三佛，迦葉姓中生；釋迦文尼佛，憍曇姓中生。<sup>128</sup>

**(B) 初深心牢固**

復次，菩薩初深心牢固，是名「諸佛姓」。

**(C) 得無生法忍**

有人言：得無生法忍，是諸佛姓——是時，得<sup>129</sup>佛一切種智氣分故；如聲聞法中姓<sup>130</sup>地人。<sup>131</sup>

**H、釋第八法：眷屬成就**

「眷屬成就」者，皆是智人、善人，世世集功德。

此中佛自說：「純以菩薩為眷屬。」如《不可思議經》中說：「瞿毘耶<sup>132</sup>是大菩薩，<sup>133</sup> (419b) 一切眷屬皆是住阿毘<sup>134</sup>跋致地菩薩；<sup>135</sup> 以方便三昧變化力，為男、為女，共<sup>136</sup>為眷屬。如轉輪聖王居士寶<sup>137</sup>是夜叉、鬼神現作人身，與人共事。」

**I、釋第九法：出生成就<sup>138</sup>**

<sup>127</sup> 生 + (成就)【元】【明】。(大正 25, 419d, n.6)

<sup>128</sup> 參見《長阿含經》卷 1 (第 1 經)《大本經》(大正 1, 2a16-19)。

<sup>129</sup> 得 = 是【石】。(大正 25, 419d, n.9)

<sup>130</sup> 姓 = 性【元】【明】。(大正 25, 419d, n.10)

<sup>131</sup> 一云、初深心牢固是

佛姓<sup>上</sup> 一云、得無生法忍是 ……… 如小乘性地 (導師《大智度論筆記》[ B015 ] p.137)

<sup>132</sup> (1)《高麗藏》作「瞿毗耶」(第 14 冊, 883c)。

(2)《大智度論》卷 33 (1 序品):「欲為諸佛給使者，如釋迦文佛未出家時，車匿給使，優陀耶戲笑；瞿毘耶、耶輸陀等諸姝女，為內眷屬。出家六年苦行時，五人給侍。得道時，彌喜、羅陀、須那剎多羅、阿難、密跡力士等，是名內眷屬。」(大正 25, 303b13-17)

<sup>133</sup> 參見 (Lamotte, p.2441, n.1): 參見《方廣佛華嚴經》卷 75:「爾時善財童子詣彼釋女瞿波之所，頂禮其足合掌而住，作如是言：『聖者！我已先發阿耨多羅三藐三菩提心，而未知菩薩云何於生死中，而不為生死過患所染？了法自性，而不住聲聞、辟支佛地？具足佛法，而修菩薩行？住菩薩地，而入佛境界？超過世間，而於世受生？成就法身，而示現無邊種種色身？證無相法，而為眾生示現諸相？知法無說，而廣為眾生演說諸法？知眾生空，而恒不捨化眾生事？雖知諸佛不生不滅，而勤供養，無有退轉？雖知諸法無業無報，而修諸善行恒不止息？』」(大正 10, 406c8-17)

<sup>134</sup> 毘 = 鞞【宋】【元】【明】【宮】。(大正 25, 419d, n.11)

<sup>135</sup> 不可思議經：瞿毘耶眷屬皆住不退。(導師《大智度論筆記》[ H016 ] p.408)

<sup>136</sup> 共 = 具【宋】【宮】。(大正 25, 419d, n.12)

<sup>137</sup> 居士寶，又稱為「主藏寶、典藏寶」，為轉輪聖王七寶 (輪寶、象寶、馬寶、珠寶、玉女寶、典藏寶、典兵寶) 之一。參見《長阿含經》卷 3《遊行經》(大正 1, 22b18-c6)。

<sup>138</sup> 第九法「出生成就」，《經》說「云何菩薩出生成就？生時光明遍照無量無邊世界，亦不取相故。」(大正 25, 417a7-8) 此處《論》未解釋，然前釋第六法「生成就」時卻提到「菩薩從

**J、釋第十法：出家成就**

「出家成就」者，如釋迦文菩薩，夜於宮殿，見諸姪<sup>139</sup>女皆如死狀<sup>140</sup>；十方諸天鬼神齋持<sup>141</sup>幡華供養之具，奉迎將出。是時車匿雖先受淨飯王勅，而隨菩薩意，自牽馬至；四天王<sup>142</sup>使者接捧<sup>143</sup>馬足，踰城而出。為破諸煩惱及魔人，示一切眾人在家之穢。如此大功德貴重之人，猶尚出家，況諸凡細！如是等因緣，名「出家成就」。

**K、釋第十一法：莊嚴佛樹成就**

「莊嚴佛樹成就」者，莊嚴菩提樹，如先說。<sup>144</sup>  
佛此中自說：「是菩提樹，以黃金為根，七寶為莖、節、枝、葉<sup>145</sup>，莖、節、枝、葉光明遍照十方無數阿僧祇諸佛世界。」

或有佛以菩薩七寶莊嚴佛樹，或有不如是者。所以者何？諸佛神力不可思議，為眾生故，現種種莊嚴。

**L、釋第十二法：一切諸善功德成滿具足**

「一切諸善功德成滿具足」者，菩薩住七地中，破諸煩惱，自利具足；住八地、九地，利益他人——所謂教化眾生，淨佛世界。自利、利他深大故，一切功德具足。<sup>146</sup>

如阿羅漢、辟支佛，自利雖重，利他輕故，不名具足；諸天及小菩薩，雖能利益他<sup>147</sup>，而自未除煩惱故，亦不具足。

是名「功德具足」。(九地竟)

**(10) 第十地<sup>148</sup>**

**A、約菩薩十地，當知如佛** (導師《大智度論筆記》〔B015〕p.138)

「當知如佛」者，菩薩坐如是樹下，入第十地，名為「法雲地」。譬如大雲澍雨，連下無間；心自然生無量無邊清淨諸佛法，念念無量。

爾時，菩薩作是念：「欲界魔王心未降伏。」放眉間光，令百億魔宮闇蔽不現。魔即瞋惱，集其兵眾來逼菩薩。

菩薩降魔已，十方諸佛慶其功勳，皆(419c)放眉間光，從菩薩頂入。是時，十

母右脇出，如滿月從雲中出，放大光明，照無量世界」(大正 25，419a11-13)。

<sup>139</sup> 姪=綵【聖】。(大正 25，419d，n.13)

<sup>140</sup> 狀=然【聖】。(大正 25，419d，n.14)

<sup>141</sup> 齋(卍)持：攜帶，攜持。(《漢語大詞典(十二)》，p.1443)

<sup>142</sup> [王]—【宋】【元】【明】【宮】【聖】。(大正 25，419d，n.15)

<sup>143</sup> 捧=奉【石】。(大正 25，419d，n.16)

<sup>144</sup> 《正觀》第 6 期，p.138：參見《智度論》卷 50 (大正 25，417a11-13)。

<sup>145</sup> [葉]—【聖】。(大正 25，419d，n.17)

<sup>146</sup> 卍 七地——破諸煩惱，自利具足

七八九地—八九地——化生嚴土，利他具足 (導師《大智度論筆記》〔B015〕p.137)

<sup>147</sup> [他]—【宋】【元】【明】【宮】【聖】【石】。(大正 25，419d，n.18)

<sup>148</sup> 卍 約三乘共地，即是佛地

十地二義—約菩薩十地，當知如佛 (導師《大智度論筆記》〔B015〕p.138)

地所得功德，變爲佛法，斷一切煩惱習，得無礙解脫，具十力、四無所畏、四無礙智、十八不共法、大慈大悲等無量無邊諸佛法。

是時，地爲六種震動，天雨華香，諸菩薩、天人皆合手讚歎。

是時，放大光明，遍照十方無量世界；十方諸佛、菩薩<sup>149</sup>、天人，大聲唱言：「某方某國某甲菩薩，坐於道場，成具佛事，是其光明。」

是名「十地當知如佛」。

**B、約三乘共地，即是佛地**（導師《大智度論筆記》〔B015〕p.138）

復次，佛此中更說第十地相，所謂菩薩行六波羅蜜，以方便力故，過乾慧地乃至菩薩地，住於佛地——佛地，即是第十地。

### **（三）總結**

菩薩能如是行十地，是名「發趣大乘」。

---

<sup>149</sup>（諸）+菩薩【宋】【元】【明】【宮】。（大正 25，419d，n.19）

〈釋出到品第二十一〉  
 (大正 25, 419c13-422a16)

【經】

三、答第三問：是乘發何處，是乘至何處<sup>150</sup>

(一) 正明：大乘從三界中出，至薩婆若中住

佛告須菩提：「汝所問『是乘何處出，至何處住』<sup>151</sup>者，佛言：是乘從三界中出，至薩婆若中住，以不二法故。何以故？摩訶衍、薩婆若，是二法共，不合、不散，無色、無形、無對，一相所謂無相。<sup>152</sup>

(二) 舉例：若欲使諸法出，即欲使無相法出

1、舉實際等無為法為類

若人欲使實際出，是人為欲使無相法出；若人欲使如、法性、不可思議性出，是人為欲使無相法出。<sup>153</sup>

2、舉蘊、入、受等空相為類

若人欲使色空出，是人<sup>154</sup>為欲使無<sup>155</sup>相法出；若人欲使受、想、行、識空出，是人為欲使無相法出。何以故？須菩提！色空相不出三界，亦不住薩婆若；受、想、行、識空相不出三界，亦不住薩婆若。所以者何？色、色相空，受……想……行……識、識相空故。

若人欲使眼空出，是人為欲使無相法出；若人欲使耳、鼻、舌、身、意空出，是人為欲使無相法出；若人欲使乃至意觸因緣生受空出，是人為欲使無相法出。何以故？須菩提！眼空不出三界，亦不住薩婆若；乃至(420a)意觸因緣生受空不出三界，亦不住薩婆若。所以者何？眼、眼相空，乃至意觸因緣生受、意觸因緣生受相空故。

3、舉夢等六事空為類

<sup>150</sup> 參見《大智度論》卷 46〈18 摩訶衍品〉：「爾時，須菩提白佛言：世尊！<sup>(1)</sup>何等是菩薩摩訶薩摩訶衍？<sup>(2)</sup>云何當知菩薩摩訶薩發趣大乘？<sup>(3)</sup>是乘發何處？是乘至何處？<sup>(4)</sup>當住何處？<sup>(5)</sup>誰當乘是乘出者？」(大正 25, 393b2-5)

關於第三問「是乘發何處，是乘至何處」，參見《大智度論》卷 50〈21 出到品〉(大正 25, 419c13-421a18)。

<sup>151</sup> 《摩訶般若波羅蜜經》卷 5〈問乘品〉：「是乘發何處？是乘至何處？」(大正 8, 250a4)  
 《大智度論》卷 46：「是乘發何處？是乘至何處？」(大正 25, 393b4)

<sup>152</sup> 參見《大般若波羅蜜多經》卷 416〈19 出住品〉：「復次，善現！汝問『如是大乘從何處出至何處住』者，善現！如是大乘從三界中出，至一切智智中住，然以無二為方便故無出無住。所以者何？善現！若大乘、若一切智智，如是二法非相應非不相應，無色、無見、無對，一相，所謂無相。」(大正 7, 88c26-89a2)

<sup>153</sup> 參見《大般若波羅蜜多經》卷 416〈19 出住品〉：「善現！諸有欲令無相之法有出住者，則為欲令真如空、實際、不思議界、安隱界、寂靜界、斷界、離界、滅界空亦有出住，然真如空乃至滅界空，不能從三界中出，亦不能至一切智智中住。何以故？真如空真如空自性空，乃至滅界空滅界空自性空故。」(大正 7, 89a7-12)

<sup>154</sup> [人] - 【聖】。(大正 25, 419d, n.24)

<sup>155</sup> 無+ (上)【聖】。(大正 25, 419d, n.25)

若人欲使夢出，是人為欲使無相法出；若人欲使幻、焰、響、影、化出，是人為欲使無相法出。何以故？須菩提！夢相不出三界，亦不住薩婆若；幻、焰、響、影、化相亦不出三界，亦不住薩婆若。<sup>156</sup>

#### 4、舉大小乘因行空為類

須菩提！若人欲使檀波羅蜜出，是人為欲使無相法出；若人欲使尸羅波羅蜜、羼提波<sup>157</sup>羅蜜、毘梨耶波羅蜜、禪波羅蜜、般若波羅蜜出，是人為欲使無相法出。何以故？檀波羅蜜相不出三界，亦不住薩婆若；尸羅波羅蜜乃至般若波羅蜜<sup>158</sup>不出三界，亦不住薩婆若。所以者何？檀波羅蜜、檀波羅蜜相空，尸羅波羅蜜……羼提波羅蜜……毘梨耶波羅蜜……禪波羅蜜……，般若波羅蜜、般若波羅蜜相空故。

若人欲使內空出乃至無法有法空出，是人為欲使無相法出。何以故？須菩提！內空相乃至無法有法空相，不出三界，亦不住薩婆若。所以者何？內空、內空性空，乃至無法有法空、無法有法空性空故。

若人欲使四念處出，是人為欲使無相法出。何以故？四念處性不出三界，亦不住薩婆若。所以者何？四念處<sup>159</sup>、四念處性空故。若人欲使四正勤、四如意足、五根、五力、七覺分、八聖道分出，是人為欲使無相法出。何以故？八聖道分性，不出三界，亦不住薩婆若。所以者何？八聖道分<sup>160</sup>、八聖道分性空故。乃至十八不共法亦如是。

#### 5、舉大小乘果空為類

須菩提！若人欲使阿羅漢出生處，是人為欲使無相法出；若人欲使辟支佛出生處，是(420b)人為欲使無相法出；若人欲使多陀阿伽度、阿羅訶、三藐三佛陀出生處，是人為欲使無相法出。何以故？須菩提！阿羅漢性、辟支佛性、佛性不出三界，亦不住薩婆若。所以者何？阿羅漢<sup>161</sup>、阿羅漢性空，辟支佛<sup>162</sup>、辟支佛性空，佛<sup>163</sup>、佛性空故。若人欲使須陀洹果、斯陀含果、阿那含果、阿羅漢果、辟支佛道<sup>164</sup>、佛道、一切種智出，是人為欲使無相法出，如上說。

#### 6、舉但名字等空為類

<sup>156</sup> (1)《放光般若經》卷4〈22 問出衍品〉：「欲出生無相法者，為欲出生夢、幻、炎、響、光、影。欲出生無相法者，為欲出生如來之所作化。何以故？夢、幻、炎、響、光、影及如來所化，亦不出三界亦不住薩云若。何以故？夢以夢事空，炎事、幻事、響光事、影事，乃至如來所化事皆自空。」(大正8, 29c20-25)

(2)案：依本經此處前後文例及《放光般若經》等異譯本，此處應有「所以者何？夢，夢相空；乃至化，化相空故」之文句。

<sup>157</sup> 波=婆【聖】，〔波〕-【石】。(大正25, 420d, n.1)

<sup>158</sup> 波羅蜜+ (相)【元】【明】。(大正25, 420d, n.2)

<sup>159</sup> 四念處+ (性)【宋】【元】【明】【宮】。(大正25, 420d, n.4)

<sup>160</sup> 分+ (性)【宋】【元】【明】【宮】。(大正25, 420d, n.5)

<sup>161</sup> 阿羅漢+ (性)【宋】【元】【明】【宮】。(大正25, 420d, n.6)

<sup>162</sup> 佛+ (性)【宋】【元】【明】【宮】。(大正25, 420d, n.7)

<sup>163</sup> 佛+ (性)【宋】【元】【明】【宮】。(大正25, 420d, n.7-1)

<sup>164</sup> 〔道〕-【石】。(大正25, 420d, n.8)

若人欲使名字、假名、施設、相、但有語言出，是人為欲使無相法出。何以故？名字空，不出三界，亦不住薩婆若。所以者何？名字相、名字相空故，乃至施設亦如是。<sup>165</sup>

**7、舉不生不滅等法性空為類**

若人欲使不生不滅法、不垢不淨、無作法出，是人為欲使無相法出。何以故？不生乃至無作法性不出三界，亦不住薩婆若。所以者何？不生性乃至無作性<sup>166</sup>性空故。<sup>167</sup>

**(三) 結**

須菩提！以是因緣故，摩訶衍從三界中出，至<sup>168</sup>薩婆若中住，不動法<sup>169</sup>故。」<sup>170</sup>

**【論】**

**三、答第三問：是乘發何處，是乘至何處**

**(一) 正明：大乘從三界中出，至薩婆若中住**

**1、釋疑：佛何故重述須菩提所問而後答**

問曰：佛已知須菩提所問，今何以更稱<sup>171</sup>而答？

答曰：是《摩訶般若波羅蜜》有十萬偈，三百二十萬言，<sup>172</sup>與《四阿含》等，此非一坐說盡。又上須菩提所問，已答二事<sup>173</sup>，異時<sup>174</sup>異日故稱第三問而答。復次，有人言：聲聞法中無有不可思議事，不得一日一坐中說盡。佛有無

<sup>165</sup> (1) 參見《大般若波羅蜜多經》卷 416〈19 出住品〉：「善現！諸有欲令無相之法有出住者，則為欲令名字、假想、施設、言說空亦有出住，然名字、假想、施設、言說空不能從三界中出，亦不能至一切智智中住。何以故？名字、假想、施設、言說空，名字、假想、施設、言說空自性空故。」(大正 7，90b26-c1)

(2) 梵文《二萬五千頌般若》，木村高尉編，I-2 (p.109)：  
**nāmnaḥ** sa Subhūte niryānam icched yo 'lakṣaṇānām dharmānām niryānam icchet, evaṃ  
**nimitṭasya saṃketasya vyavahārasya prajñapṭeḥ** sa Subhūte niryānam icched  
 yo 'lakṣaṇānām dharmānām niryānam icchet.

<sup>166</sup> 性=無作【宋】【元】【明】【宮】【聖】【石】。(大正 25，420d，n.9)

<sup>167</sup> 參見《大般若波羅蜜多經》卷 416〈19 出住品〉：「善現！諸有欲令無相之法有出住者，則為欲令無生無滅、無染無淨、無相無為空亦有出住，然無生無滅、無染無淨、無相無為空不能從三界中出，亦不能至一切智智中住。何以故？無生無滅、無染無淨、無相無為空無生無滅、無染無淨、無相無為空自性空故。」(大正 7，90c1-7)

<sup>168</sup> [至]—【宋】【元】【明】【宮】【聖】。(大正 25，420d，n.10)

<sup>169</sup> [法]—【宋】【元】【明】【宮】。(大正 25，420d，n.11)

<sup>170</sup> 參見《大般若波羅蜜多經》卷 416：「善現！由此因緣，如是大乘從三界中出，至一切智智中住，然以無二為方便故無出無住。所以者何？無相之法無動轉故。」(大正 7，90c7-10)

<sup>171</sup> 稱：述說，聲稱。(《漢語大詞典》(八)，p.111)

<sup>172</sup> (1) 般若數量：十萬偈。(導師《大智度論筆記》[E008] p.300)

(2) 般若：是摩訶般若波羅蜜有十萬偈，三百二十萬言。(導師《大智度論筆記》[H003] p.391)

<sup>173</sup> 須菩提問了五個問題，參見《摩訶般若波羅蜜經》卷 5〈18 問乘品〉，「爾時，須菩提白佛言：世尊！<sup>(1)</sup>何等是菩薩摩訶薩摩訶衍？<sup>(2)</sup>云何當知菩薩摩訶薩發趣大乘？<sup>(3)</sup>是乘發何處？是乘至何處？<sup>(4)</sup>當住何處？<sup>(5)</sup>誰當乘是乘出者？」(大正 8，250a2-5)

《大智度論》卷 46~卷 50 已答了前二事：1、菩薩摩訶薩摩訶衍，卷 46~卷 48 (大正 25，393b-409c)，2、發趣大乘，卷 49~卷 50 (大正 25，409c-419c)。

<sup>174</sup> [異時]—【宋】【元】【明】【宮】【聖】。(大正 25，420d，n.13)

礙解脫，菩薩有不可思議三昧，能令多時作少時、少時作多時，亦能以大色入小、小色作大。又如六十小劫說《法華經》，人謂從旦<sup>175</sup>至食。<sup>176</sup>

問曰：色有形可見，時無形但有名，云何得以近爲遠、以遠爲近？

答曰：以是故說以不可思議神通力。如人夢中，夢有所見，自以爲覺；(420c) 夢中復夢，如是展轉，故是一夜。

以是故，更稱其問而答。

## 2、釋經

### (1) 釋「大乘從三界中出，至薩婆若中住」

「是乘何處出，至何處住」者，佛答：「是乘從三界中出，至薩婆若中住。」

#### ※ 因論生論：是乘是佛法或是菩薩法

問曰：是乘爲是佛法？爲是菩薩法？若是佛法，云何從三界出？若是菩薩法，云何薩婆若中住？

答曰：是乘是菩薩法，乃至金剛三昧；是諸功德清淨，變爲佛法。

是乘有大力，能有所去，直以至佛，更無勝處可去，故言「住」。譬如劫盡火燒三千世界，勢力甚大，更無所燒，故便自滅；摩訶衍亦如是，斷一切煩惱、集諸功德，盡其邊際，更無所斷<sup>177</sup>、更無所知、更無所集故，便自歸滅。

### (2) 釋「以不二法故」

「不二法」者，斷諸菩薩著故說。<sup>178</sup>

### (3) 釋「不合、不散，無色、無形、無對，一相所謂無相」

此中佛自說：「大乘、薩婆若」，是二法——不一故「不合」，不異故「不散」；六情所知盡虛妄故「無色、無形、無對、一相」。

#### ※ 因論生論：先言「不一故不合」，今何以言「一相」

問曰：先言「不一故不合」<sup>179</sup>，今何以言「一相」？<sup>180</sup>

答曰：此中言「一相，所謂無相」，無相則無有出至佛道；爲引導凡夫人故，

<sup>175</sup> (1) 《大正藏》原作「日」，今依《高麗藏》作「旦」(第14冊，885b21)。

(2) 旦：1、天亮。2、清晨；早晨。(《漢語大詞典》(五))，p.556)

<sup>176</sup> (1) 參見《妙法蓮華經》卷1〈1序品〉：「是時日月燈明佛從三昧起，因妙光菩薩，說大乘經，名《妙法蓮華》，教菩薩法，佛所護念，六十小劫不起于座。時會聽者亦坐一處，六十小劫身心不動，聽佛所說，謂如食頃。是時眾中無有一人若身若心而生懈倦。日月燈明佛於六十小劫說是經已，即於梵、魔、沙門、婆羅門及天、人、阿修羅眾中而宣此言：『如來於今日中夜當入無餘涅槃。』」(大正9，4a23-b2)

(2) 法華經：六十小劫說經。(導師《大智度論筆記》〔H015〕p.406)

(3) 時間長短無礙。(導師《大智度論筆記》〔E008〕p.300)

<sup>177</sup> 〔斷〕—【聖】。(大正25，420d，n.14)

<sup>178</sup> 不二法：斷菩薩著故說。(導師《大智度論筆記》〔E007〕p.299)

<sup>179</sup> 《大智度論》卷50〈21出到品〉：「此中佛自說：大乘、薩婆若，是二法——不一故不合，不異故不散；六情所知盡虛妄故，無色、無形、無對、一相。」(大正25，420c13-15)

<sup>180</sup> 參見《智度論》卷50：「摩訶衍、薩婆若是二法共，不合、不散、無色、無形、無對，一相所謂無相。」(大正25，419c16-18)

說言「一相」。<sup>181</sup>

**(二) 釋所舉例**

**1、釋實際等無爲法爲類**

**(1) 釋「若人欲使實際出，是人爲欲使無相法出」**

「實際」者，是諸法末後實相，無出無入；若有狂人欲使實際出至佛道者，此人則欲使無相法出。

**(2) 例同如、法性、法相**

如、法性、<sup>182</sup>法<sup>183</sup>相<sup>184</sup>，如先說。

**(3) 釋「不可思議性」**

「不可思議性」者，

**A、即是如、法性、實際，心心數法滅故**

有人言：即是如、法性、實際，無量無邊，心心數法滅，故言「不可思議」。

**B、過實際、涅槃，更求諸法實，若有若無**

復有人言：過實際、涅槃，更求諸法實，若有若無，是名「不可思議」。

**C、一切諸佛法無有能思惟籌量者**

復次，一切諸佛法，無有能思惟籌量者，故名「不可思議」。

**D、一切諸法，分別思惟，皆同涅槃相**

復有人言：一切諸法，分別思惟，皆同涅槃相，是「不可思議」。

**2、舉蘊、入、受等空相爲類**

若人欲使空中出，此人則欲使無相法中出。

此中佛自說：「五眾<sup>185</sup>空相，不能出三界，不能至薩婆若，五眾中五眾相空故；十(421a)二入乃至意觸因緣生受空，亦如是。」

**3、舉夢等六事空爲類**

夢等空譬喻，亦如是——自相空故，無出無至。

**4、舉大小乘因行空爲類，5、舉大小乘果空爲類**

若人欲使六波羅蜜出，此人則爲欲使無相法出。何以故？六波羅蜜因緣和合故無自性，自性無故空。

菩薩著六波羅蜜，墮邪道，故爲說空。<sup>186</sup>

十八空乃至一切種智，亦如是。

<sup>181</sup> 一相無相：導凡夫說。(導師《大智度論筆記》[E008] p.300)

<sup>182</sup> 《正觀》第 6 期，p.138：如、法性，參見《大智度論》卷 32 (大正 25，297b24-c12)。

<sup>183</sup> [法]—【宋】【宮】。(大正 25，420d，n.15)

<sup>184</sup> 《正觀》第 6 期，p.138：法相，參見《大智度論》卷 6 (大正 25，102c26-29)，卷 15 (169c3-29；171a7-18)，卷 18 (194b1-195a13)，卷 25 (246a23-b11)，卷 31 (293a25-294c10)，卷 32 (298c)，卷 53 (436b15-18)，卷 67 (528b16-28)，卷 70 (550c10-15)。

<sup>185</sup> (此) + 五眾【石】。(大正 25，420d，n.16)

<sup>186</sup> 六度：遣著故說空。(導師《大智度論筆記》[E008] p.300)

※ 因論生論：出世間六度等無所著，何以說空

問曰：六波羅蜜有道俗，俗<sup>187</sup>可著故可說空；出世間六波羅蜜、三十七品乃至十八不共法，無所著故，何以說空？

答曰：諸菩薩漏未盡，以福德、智慧力故行是法，或取相愛著故。

凡夫法虛妄顛倒，此法從凡夫法邊生，云何是實？

以是故，佛說是亦空，以喻無相法。

是大乘即是無相，無相云何有出、有至？

6、舉但名字等空為類

諸法皆空，但有名字相、假名、語言；今名字等亦空，以喻無相，第一義中不可得；世俗法中有相。<sup>188</sup>

名字等假名相義，如先說。<sup>189</sup>

(三) 小結

用如是法，從三界出<sup>190</sup>，至薩婆若中住；非是實法，亦無所動。

【經】

四、答第四問：是乘當住何處<sup>191</sup>

(一) 標宗：明無住而住

須菩提！汝所問『是乘何處住』者，須菩提！是大乘無住處。何以故？一切法無住相故。是乘若住，不住法住。<sup>192</sup>

(二) 舉喻

須菩提！譬如法性，不生不滅、不垢不淨、無起<sup>193</sup>無作，非住非不住。

(三) 合法

須菩提！是乘亦如是，非住非不住。<sup>194</sup>

(四) 釋理

<sup>187</sup>〔俗〕－【宋】【元】【明】【宮】【石】。(大正 25, 421d, n.1)

<sup>188</sup> 二諦：有名相，無名相。(導師《大智度論筆記》〔E002〕p.286)

<sup>189</sup>《正觀》第 6 期，p.138：參見《智度論》卷 25 (大正 25, 246a23-c24)，卷 36 (326b20-327a19)，卷 41 (358a17-c8)，卷 42 (364c1-365a15)。

<sup>190</sup>〔出〕－【聖】【石】。(大正 25, 421d, n.2)

<sup>191</sup> 參見《大智度論》卷 46〈18 摩訶衍品〉：「爾時，須菩提白佛言：世尊！<sup>(1)</sup>何等是菩薩摩訶薩摩訶衍？<sup>(2)</sup>云何當知菩薩摩訶薩發趣大乘？<sup>(3)</sup>是乘發何處？是乘至何處？<sup>(4)</sup>當住何處？<sup>(5)</sup>誰當乘是乘出者？」(大正 25, 393b2-5)

<sup>192</sup> 參見《大般若波羅蜜多經》卷 417〈19 出住品〉：「復次，善現！汝問『如是大乘為何所住』者，善現！如是大乘都無所住。所以者何？以一切法皆無所住。何以故？諸法住處不可得故。善現！如是大乘以無所得而為方便住無所住。」(大正 7, 90c18-21)

<sup>193</sup> 起＝相【宋】【元】【明】【宮】【聖】。(大正 25, 421d, n.3)

<sup>194</sup> 參見《大般若波羅蜜多經》卷 417〈19 出住品〉：「善現！如法界非住非不住。所以者何？以法界自性無住無不住。何以故？法界自性法界自性空故，大乘亦爾，非住非不住。」(大正 7, 90c21-24)

何以故？法性相乃至無作相<sup>195</sup>，非住非不住。所以者何？法性相<sup>196</sup>性空故，乃至無作<sup>197</sup>性、無作<sup>198</sup>性性空故。諸餘法亦如是。

**【五】結成**

須菩提！以是因緣故，是乘無住處<sup>199</sup>，以不住法<sup>200</sup>、不動法故。」<sup>201</sup>

**【論】**

**四、答第四問：是乘當住何處**

**（一）標宗：明無住而住**

問曰：上言「是乘到薩婆若，更無勝法可去」<sup>202</sup>，今何以復說「是乘無住處」？

答曰：先說（421b）「以空、不二法故言住」，如幻、如夢，雖有坐臥行住，非實是住；菩薩亦如是，雖言「到薩婆若住」，亦無定住。<sup>203</sup>

佛此<sup>204</sup>中自說：「一切法從本已來無住相，云何獨大乘有<sup>205</sup>住？若有所住，以畢竟空法住。」

**（二）舉喻**

譬如：如、法性、法相、實際，非住、非不住，不生不滅、不垢不淨、不起不作。

**（三）釋「非住非不住」<sup>206</sup>**

**1、不住者，自相中不住；非不住者，異相中不住**（導師《大智度論筆記》〔B015〕p.138）

「不住」者，自相中不住；「非不住」者，異相中不住。

**2、不住者，說空破有；非不住者，說世諦有住**（導師《大智度論筆記》〔B015〕p.138）

「不住」者，說空破有；「非不住」者，說世諦方便有住。

**3、不住者，說無常破常；非不住者，破滅相**（導師《大智度論筆記》〔B015〕p.138）

「不住」者，說無常破常相；「非不住」者，破滅相。

**4、佛自說：自相空故非住非不住**

<sup>195</sup> 〔乃至無作相〕－【宋】【元】【明】【宮】【聖】【石】。（大正 25，421d，n.5）

<sup>196</sup> 相＝法【元】【石】。（大正 25，421d，n.6）

<sup>197</sup> 作＝住【聖】。（大正 25，421d，n.7）

<sup>198</sup> 作＝住【聖】。（大正 25，421d，n.7）

<sup>199</sup> 住處＝所住【宋】【宮】【聖】，＝所住處【元】【明】。（大正 25，421d，n.8）

<sup>200</sup> 法＝故【石】。（大正 25，421d，n.9）

<sup>201</sup> 參見《大般若波羅蜜多經》卷 417〈19 出住品〉：「善現！由此因緣，如是大乘雖無所住，而以無二為方便故住無所住。」（大正 7，92b6-8）

<sup>202</sup> 《大智度論》卷 50：「直以至佛，更無勝處可去，故言住。」（大正 25，420c7-8）

<sup>203</sup> 《正觀》第 6 期，p.138：參見《智度論》卷 50（大正 25，419c14-18）的經文與（大正 25，420c3-15）論的解說。

<sup>204</sup> 此＝是【石】。（大正 25，421d，n.10）

<sup>205</sup> 有＝自【宋】【宮】。（大正 25，421d，n.11）

<sup>206</sup> 一、不住者，自相中不住；非不住者，異相中不住。

非住非不住— 一、不住者，說空破有；非不住者，說世諦有住。

└ 一、不住者，說無常破常；非不住者，破滅相。

（導師《大智度論筆記》〔B015〕p.138）

此中佛自說：「法性、法<sup>207</sup>性相空。何以故？自相空故。乃至無起無作諸餘法亦如是。」

【經】

五、答第五問：誰當乘是乘出者<sup>208</sup>

(一) 乘、出者、所用法、出時等諸法空無所有，故無人乘出

須菩提！汝所問『誰當乘是乘出者』<sup>209</sup>，無有人乘是乘出者。何以故？是乘及<sup>210</sup>出者，所用法及出時——是一切法皆無所有；若一切法無所有，用何等法當出？<sup>211</sup>

(二) 明人法二空不可得

何以故？我不可得，乃至知<sup>212</sup>者、見者不可得，畢竟淨故。不可思議性不可得，畢竟淨故。眾<sup>213</sup>、入、界不可得，畢竟淨故。檀波羅蜜不可得，畢竟淨故；乃至般若波羅蜜不可得，畢竟淨故。內空不可得，畢竟淨故；乃至無法有法空不可得，畢竟淨故。四念處不可得，乃至十八不共法不可得，畢竟淨故。須陀洹不可得，乃至阿羅漢、辟支佛、菩薩、佛不可得，畢竟淨故。<sup>214</sup>須陀洹果，乃至阿羅漢果、辟支佛道、佛道、一切種智不可得，畢竟淨故。不生不滅，不垢不淨，無起無作不可得，畢竟淨故。過去世、未來世、現在世，生、住、滅不可得，畢竟淨故。增、減不可得，畢竟淨故。

(三) 釋不可得因緣

1、一切人法不可得故

何法不可得故不可得？法性不可得故不可得，如、實際、不可思議性、法性、法相、法位；檀波羅蜜不可得故(421c)不可得，乃至般若波羅蜜不可得故不可得。

<sup>207</sup> 法=相【石】。(大正 25, 421d, n.12)

<sup>208</sup> 參見《大智度論》卷 46〈18 摩訶衍品〉：「爾時，須菩提白佛言：世尊！<sup>(1)</sup>何等是菩薩摩訶薩摩訶衍？<sup>(2)</sup>云何當知菩薩摩訶薩發趣大乘？<sup>(3)</sup>是乘發何處？是乘至何處？<sup>(4)</sup>當住何處？<sup>(5)</sup>誰當乘是乘出者？」(大正 25, 393b2-5)

<sup>209</sup> 《摩訶般若波羅蜜經》卷 5〈問乘品〉：「誰當乘是乘出者？」(大正 8, 250a4-5)  
《大智度論》卷 46：「誰當乘是乘出者？」(大正 25, 393b4-5)

<sup>210</sup> [及]—【宋】【宮】【聖】。(大正 25, 421d, n.13)

<sup>211</sup> 參見《大般若波羅蜜多經》卷 417〈19 出住品〉：「復次，善現！汝問『誰復乘是大乘而出』者，善現！都無乘是大乘出者。何以故？善現！若所乘乘、若能乘者、若時、若處，如是一切皆無所有不可得故。所以者何？以一切法皆無所有都不可得，如何可言有所乘乘、有能乘者、乘時、乘處？故不可說實有乘是大乘出者。」(大正 7, 92b9-14)

<sup>212</sup> 知=智【石】。(大正 25, 421d, n.14)

<sup>213</sup> 眾=陰【石】。(大正 25, 421d, n.15)

<sup>214</sup> 參見《大般若波羅蜜多經》卷 417〈19 出住品〉：「善現！預流者無所有不可得故，乘大乘者亦不可得。所以者何？畢竟淨故。一來、不還、阿羅漢、獨覺、菩薩、如來亦無所有不可得故，乘大乘者亦不可得。所以者何？畢竟淨故。」(大正 7, 93a10-14)

內空不可得故不可得，乃至無法有法空中不可得故不可得。四念處不可得故不可得，乃至十八不共法不可得故不可得<sup>215</sup>。須陀洹不可得故不可得，乃至佛不可得故不可得。須陀洹果不可得故不可得，乃至佛道不可得故不可得。不生不滅，乃至不起不作不可得故不可得。

復次，須菩提！初地不可得故不可得，乃至第十地不可得故不可得，畢竟淨故。云何為初地乃至十地？所謂乾慧地、性地、八人地、見地、薄地、離欲<sup>216</sup>地、已作地、辟支佛地、菩薩地、佛地。

## 2、十八空中十地、成就眾生、淨佛世界、五眼等皆不可得故

內空中初地不可得，乃至無法有法空中初地不可得；內空乃至無法有法空中，第二、第三、第四、第五、第六、第七、第八、第九、第十地不可得。何以故？須菩提！初地非得非不得，乃至十地非得非不得，畢竟淨故。

內空乃至無法有法空中，成就眾生不可得，畢竟淨故。內空乃至無法有法空中，淨佛世界不可得，畢竟淨故。內空乃至無法有法空中，五眼不可得，畢竟淨故。

## (四) 結：以不可得故，菩薩乘摩訶衍出薩婆若

如是，須菩提！菩薩摩訶薩，以一切諸法不可得故，乘是摩訶衍出薩婆若。」

【論】者<sup>217</sup>言：

## 五、答第五問：誰當乘是乘出者

### (一) 乘、出者、所用法、出時等諸法空無所有，故無人乘出<sup>218</sup>

#### 1、釋「出」之意義

「出」者，行是乘到佛道邊出。

又復以成就故名「出」——以是乘成就薩婆若，是名為「出」。

#### 2、釋「乘」、「所用法」、「出者」三法空

此中佛自說空因緣：「乘」者，是六波羅蜜。「所用法」者，是慈悲、方便等諸法，六波羅蜜所不攝。「出者」，是菩薩——是三法皆空。

### (二) 依法空、眾生空明諸法畢竟空〔畢竟淨〕

此中佛復說因緣：「我不可得，乃至知者<sup>219</sup>、見者不可得，畢竟空故。」

五眾、十二入、十八界，檀波羅蜜乃至十八不共法，須陀洹乃至薩婆若，<sup>220</sup>不生不(422a)滅、不垢不淨，乃至三世、三相、增減等——是名法空。

<sup>215</sup> 得+ (須陀洹不可得)【石】。(大正 25, 421d, n.16)

<sup>216</sup> [欲] - 【宋】【宮】【聖】。(大正 25, 421d, n.17)

<sup>217</sup> (論) + 者【元】【明】，者=釋【石】。(大正 25, 421d, n.18)

<sup>218</sup> 案：經舉乘、出者、所用法、出時等四法空，但論僅釋前三法。

<sup>219</sup> [者] - 【宋】【元】【明】【宮】【聖】。(大正 25, 421d, n.19)

<sup>220</sup> 「須陀洹乃至薩婆若」，指《摩訶般若波羅蜜經》卷 6〈21 出到品〉所說：「須陀洹不可得，乃至阿羅漢、辟支佛、菩薩、佛不可得，畢竟淨故。須陀洹果乃至阿羅漢果、辟支佛道、佛道、一切種智不可得，畢竟淨故。」(大正 8, 260c14-17)

前面之「須陀洹」指能證得初果之人，後面的「須陀洹果」指所證得的果位。

我乃至知者、見者，須陀洹乃至佛，是名眾生空。

**〔三〕釋不可得因緣**

**1、明法無故不可得，非智慧少故不能得**

問曰：有二種不可得：一者、有法，智慧少故不能得；二者、有大智慧，推求不能得。<sup>221</sup>此云何不可得？

答曰：是法無故不可得。

**※ 因論生論：諸法不可得之益——不落二邊，畢竟清淨**

問曰：一切法本末不可得，於人有何利益<sup>222</sup>？

答曰：此中佛自說：「畢竟清淨故。」「畢竟」者，若行者依「無」而破「有」，於「有」得清淨，於「無」未清淨，以依止故。

**2、明不可得因緣**

**〔1〕一切人法不可得故**

此中佛自說不可得因緣：一切眾生不可得，一切法不可得——譬如如、法性、實際等，乃至不作、不起不可得。

**〔2〕十八空中十地、成就眾生、淨佛世界、五眼等皆不可得故**

復次，十八空故，法性不可得；乃至不起不作。

十八空中，無初地乃至十地，無成就眾生，無淨佛世界，無五眼；以十八空故空，畢竟清淨故不可得。

**〔四〕結**

菩薩用不可得法，乘是乘出薩婆若。

<sup>221</sup> 有法，智慧少故不能得  
二種不可得——有大智慧，推求不能得（導師《大智度論筆記》〔B015〕p.138）

<sup>222</sup> 〔益〕—【宋】【宮】。（大正 25，422d，n.1）